

- प्रदेश ऊं राज्यसभा री एक सीट रा उपचुनाव मांय भारतीय जनता पार्टी रा उम्मीदवार रवनीत सिंह निर्विरोध चुणी ज्या।
- राज्यपाल हरिभाऊ किशनराव बागडे पहली कक्षा ऊं चरित्र निर्माण अर संस्कारी नागरिक बणावण वाळी सीख माथे जोर दीनो।
- हैड कांस्टेबल बाबूलाल बैरवा कानी ऊं आपहित्या करण रा मामला री जांच सारू सरकार एसआईटी बणावण रो फ़ैसलो कीनो।
- पैरालम्पिक खेल-2024 काल पेरिस मांय सरू व्हेला-भारत रा 84 सदस्यां रा दल मांय नौ खिलाडी राजस्थान रा।

000

प्रदेश ऊं राज्य सभा री एक सीट माथे उप-चुनाव मांय भारतीय जनता पार्टी रा उम्मीदवार रवनीत सिंह रे निर्विरोध चुण्या जावण रो एलाण कर दियो ज्यो है। आज ई उपचुनाव सारू नाम पाछा लेवण री मियाद पूरी व्ह्यां पाछे उप-चुनाव रा निर्वाचन अधिकारी अर विधानसभा रा प्रमुख सचिव महावीर प्रसाद शर्मा चुणी ज्या उम्मीदवार रवनीत सिंह रा अधिकृत चुणाव एजेंट योगेन्द्र सिंह तंवर ने चुणाव रो प्रमाण-पत्र संप्यो। विधानसभा अध्यक्ष वासुदेव देवनानी उप चुनाव मांय निर्विरोध चुण्या जावण परां रवनीत सिंह ने बधाई दीनी है।

00000

राज्यपाल हरिभाऊ किशनराव बागडे गुणवत्तापूर्ण शिक्षा सारू जमीनी स्तर माथे कोशिश करण बाबत कह्यो है। वे आज जयपुर रा राजभवन मांय शिक्षा विभाग री समीक्षा बैठक मांय बोल रह्या हा। राज्यपाल स्कूलां मांय पहली कक्षा ऊं चरित्र बणावण अर संस्कारी नागरिक बणावण वाळी भणाई लिखाई माथे जोर दीनो। वे पिछाडी हलकां री पिछाण कर र वठे स्कूल खोलण ने बधावो देवण बाबत ई कह्यो। राज्यपाल गांवां रा गरीब बच्चां ने गुणवत्ता वाळी शिक्षा आसानी ऊं मुहैया करावण माथे खास ध्यान देवण बाबत कह्यो। वे घुमंतू पिरवारां रा बच्चां री भणाई लिखाई सारू कोशिश करण माथे ई जोर दीनो। राज्यपाल स्कूलां मांय चरित्र बणावण, संस्कार, देशभक्ति री सीख अर नैतिक शिक्षा रा पाठ पढ़ावण री जरूरत माथे ई जोर दीनो। वे स्कूलां मांय खेल मैदान अर चारदीवारी बणावण, सूरज री रोशनी ऊं बिजली बणावण अर पौधा रोपण सारू हर लेवल माथे कोशिश करण बाबत ई कह्यो। मीटिंग मांय शिक्षा मंत्री मदन दिलावर कह्यो के राज्य मांय संस्कार शिक्षा देवण माथे खास ध्यान दियो जा रह्यो है।

00000

उप मुख्यमंत्री दिया कुमारी आज राजस्थान पर्यटन विकास निगम रा कामकाज रो जायजो लीनो। अहलकारां सागे मीटिंग रे दौरान वे कह्यो के राज्य मांय सैर-सपाटा रा हलका मांय विकास री घणी संभावनावां है। दिया कुमारी राज्य ने सैर-सपाटा रा हलका मांय अव्वल बणावण सारू जरूरी कार्य योजना बणावण माथे जोर दीनो।

00000

सिक्किम रा राज्यपाल ओम प्रकाश माथुर कह्यो है के सिक्किम अर राजस्थान मांय सैर-सपाटा रा हलका मांय खूब संभावनावां है। वे आज पाली जिला रा रणकपुर मांय खबरनवीसां सागे बातचीत कर रह्या हा। माथुर कह्यो के दोन्यूं राज्यां रा मंत्री अर अहलकार ई हलका मांय मदद कर र सैलानियां री तादाद मांय बधोतरी कर सके है।

0000

प्रदेश मांय अपराधां माथे काबू करण, कानून व्यवस्था बणायी राखण अर जनता री हिफाजत ऊं जुड्या मुद्दां माथे राज्य पुलिस रा आला अहलकारां रो दो दिन रो सम्मेलन काल जयपुर मांय सरू व्हेला। पुलिस महानिदेशक उत्कल रंजन साहू आ जाणकारी दीनी। वे बतायो के मुख्यमंत्री भजनलाल शर्मा 'पुलिसिंग विद एक्सीलेंस-द वे फॉरवर्ड' मुद्दा माथे राख्या जावण वाळा ई खास सम्मेलन रो उद्घाटन करेला। पुलिस महानिदेशक बतायो के सम्मेलन मांय राज्य मांय बेहतर पुलिसिंग रा बारा मांय राज्य पुलिस रा आला अहलकार अर जाणकार न्यारा-न्यारा सत्रां मांय प्रजेंटेशन देवेला।

00000

जयपुर मांय पुलिस रा हैड कांस्टेबल बाबूलाल बैरवा कानी ऊं आप-हित्या करण रा मामला री तुरत जांच सारू अतिरिक्त पुलिस महानिदेशक दिनेश एम.एन. री अगुवाई मांय खास जांच टीम- एस.आई.टी. बणावण रो फ़ैसलो करी ज्यो है। उप मुख्यमंत्री प्रेम चंद बैरवा वां रा रेहवास माथे आ जाणकारी दीनी। वे बतायो के मर्या हैड कांस्टेबल बैरवा रा बेटा ने बेगी ई सरकारी नौकरी अर वां री बेटा ने जयपुर मांय संविदा रा आधार ऊं नौकरी दी जावेला। ई रे अलावा मर्या हैड कांस्टेबल री बेटा ने पुलिस परिवार गोद ले र वां री भणाई-लिखाई अर ब्याह री जिम्मेदारी पुलिस महकमा रा अहलकार अर कर्मचारी उठावेला। पुलिस महकमा री

ओर ऊं स्वैच्छिक आर्थिक सहयोग री प्रक्रिया ई बेगी ई पूरी कर ली जावेला। उप मुख्यमंत्री बतायो के मरण वाळा हैड कांस्टेबल रा सेवा परिलाभ री रकम अर पेंशन री प्रक्रिया ई बेगी ई सुरू कर दी जावेला। ई मामला मांय हाल ताई आर.पी.एस. अहलकार अनिल शर्मा अर जगदीश व्यास ने ए.पी.ओ. अर एस.आई. आशुतोष सिंह ने मुअत्तल करी ज्या है।

ई बीचे आज सरकार सागे बातचीत पाछे मर्या हैड कांस्टेबल रा पिरवार वाळा वां रो दाग करण सारु राजी व्हे ग्या है।

0000

दौसा री पुलिस लाइन मांय कर्तव्य पूरो करण रे दौरान जान री बाजी लगा देवण वाळा सिपाही प्रहलाद सिंह री मूर्ति रो एसपी रंजीत शर्मा अनावरण कीनो। ई मौके एसपी सिपाही प्रहलाद सिंह रा मां-बाप, जोड़ायत अर वां रा बच्चां रो मान करी ज्यो। ध्यानजोग है के 1 साल पैली दौसा जिला रा रेटा गांव मांय बदमाशां सागे मुठभेड़ रे दौरान सिपाही प्रहलाद सिंह रा माथा मांय गोळी लाग ग्यी ही, जिण ऊं वां री मौत व्हे ग्यी ही।

000

सेना भर्ती कार्यालय जयपुर री ओर ऊं सीकर मांय 02 ऊं 11 सितम्बर ताई सेना भर्ती रैली राख्ही जावेला। प्रदेश मांय आ ई साल री तीजी सेना भर्ती रैली व्हेला। रैली मांय जयपुर, जयपुर ग्रामीण, सीकर, दूदू अर नीम का थाना जिला रा उम्मीदवार सिरकत कर सकेला। रैली मांय अग्निवीर जनरल ड्यूटी, अग्निवीर टेक्निकल, अग्निवीर ऑफिस असिस्टेंट/एसकेटी, अग्निवीर ट्रेड्समैन श्रेणियां सारु सामान्य प्रवेश परीक्षा- 2024 मांय पास व्हेया पांच हजार ऊं बत्ता उम्मीदवारां ने बुलायी ज्या है।

00000

फ्रांस री राजधानी पेरिस मांय काल पैरालिम्पिक खेल 2024 सुरू व्हेला। 8 सितम्बर ताई चालण वाळा आं खेलां मांय भारत रा 84 खिलाड़ी सिरकत कर रह्या है। आं मांय राजस्थान रा पैरा एथलीट सुंदर सिंह गुर्जर, संदीप चौधरी, अरुण लेखरा, मोना अग्रवाल, रुद्रांश खंडेलवाल अर निहाल सिंह, बैडमिंटन खिलाड़ी कृष्णा नागर, अनिता चौधरी अर तीरंदाज श्याम सुंदर ई भारत री नुमाइंदगी कर रह्या है। मुख्यमंत्री भजनलाल शर्मा सोशल मीडिया संदेश रे मार्फत पैरालिम्पिक खेलां मांय सिरकत करण वाळा भारत रा सगळा खिलाडियां ने शुभकामनावां दीनी है।

00000

आकाशवाणी जयपुर री ओर ऊं आज जयपुर रा जवाहर कला केन्द्र मांय देश री आजादी ने समर्पित संगीत उत्सव राख्यो जा रह्यो है। कार्यक्रम मांय नामी गायिका सीमा मिश्रा, राजस्थानी गीत अर गायक रविंद्र उपाध्याय अर गौरव जैन सुगम संगीत री प्रस्तुतियां दे रह्या है। कार्यक्रम मांय मोमिन खान कानी ऊं सारंगी वादन अर युसूफ खान मेवाती कानी ऊं भपंग बजावण री प्रस्तुतियां ई दी जावेला।

000

राज्य रा न्यारा-न्यारा हलका मांय आज ई मेह बरस्यो। केई जिलां मांय आज हल्की ऊं मझला दर्जा री बिरखा रा समाचार है। जयपुर मांय छांटो-छिड़को व्हेयो। डूंगरपुर जिला मांय ई आज मेह बरस्यो। लारला दो दिन ऊं व्हे रही बारिश ऊं नदी-नाळां मांय पाणी उफण रह्यो है। चूरु मांय ई चोखो मेह बरस्यो। जैसलमेर मांय ई सिंज्या री पोर छांटो छिड़को व्हेयो। लारला 24 घंटा मांय बांसवाड़ा अर डूंगरपुर जिलां मांय केई ठौड़ां जदके जयपुर अर उदयपुर मांय कठे-कठे भारी बिरखा दर्ज करी ज्यी। बांसवाड़ा जिला रा बागीदौरा मांय सब ऊं बत्ती 202 मिली मीटर बरसात दर्ज करी ज्यी। मौसम केंद्र जयपुर कानी ऊं मिली जाणकारी रे मुजब उदयपुर अर जोधपुर संभाग मांय आवता 48 घंटां रे दौरान कठे-कठे जोरदार बायरो बाजण सागे रुक-रुक र बिरखा व्हेवण तो कठे-कठे भारी बारिश रा आसार है। बीकानेर, भरतपुर, जयपुर अर अजमेर संभाग रा कुछ हलकां मांय आवता दो-तीन दिन बादळां री गाज सागे बिरखा रा आसार है।

ई बीचे सवाईमाधोपुर जिला रा बौली मांय आज किसान घणी बिरखा रे कारण साखां ने व्हेया नुकसाण रो मुआवजो दिरावण सारु गिरदावरी करावण री मांग कीनी है।

0000

प्रदेश रा न्यारा-न्यारा कृष्ण मिंदरां मांय आज नंदोत्सव धूम-धाम सागे मनायो जा रह्यो है। जयपुर मांय आज दोपहरां पाछे गोविंद देवजी री शोभायात्रा निकाळी ज्यी। राजसमंद जिला रा नाथद्वारा मांय श्रीनाथजी री सोहवणी झांकी सजाई ज्यी अर खास पूजा-अर्चना करी ज्यी। चित्तौडगढ़ रा सांवलिया सेठ अर सीकर रा खाटूश्यामजी मिंदर मांय ई मोकळा जातरु पूग्या। झालावाड़ जिला रा द्वारकाधीश मिंदर अर करौली जिला रा मदनमोहन जी मिंदर मांय ई नंदोत्सव धूमधाम सागे मनायी ज्यो। भरतपुर रा किला माथे बांके बिहारी मिंदर, अर नदिया गोपाल मिंदर मांय फूल बंगला झांकी सजाई ज्यी। जातरु बधाई गीत गा र भगवान कृष्ण रा जन्म री खुशियां मनायी। सवाईमाधोपुर जिला मांय आज नंदोत्सव रा कार्यक्रम पारंपरिक सिरधा भाव अर उमाव सागे मनायो जा रह्यो है।

000

गोगा नवमी रे मौके आज प्रदेश मांय न्यारी-न्यारी ठोड़ां लोक देवता गोगाजी री आराधना करी जा रही है। हनुमानगढ़ जिला रा गोगामेडी मांय गोगाजी रो मेळो भर रह्यो है, जिण मांय मोटी तादाद मांय जातरू पूग रह्या है। पाली मांय केसरिया कंवर महाराज मंदर मांय गोगा नवमी रे मौके खास साज-सज्जा करी ज्यी अर जातरू दूध, नारियल अर फूलां ऊं पूजन कीनो। डीग जिला मांय कामां रा बाबा जाहरवीर मंदर मांय गोगा जी महाराज री फूल बंगला झांकी सजाई ज्यी। सिंज्या री पोर महाआरती रो कार्यक्रम व्हेला। टोंक मांय लोक देवता गोगा जी री शोभायात्रा निकाळी ज्यी अर घण्टाघर कने मेळो भर्यो। चूरू मांय ई गोगा जी रो मेळो भर रह्यो है जिण मांय मोटी तादाद मांय जातरू पूग रह्या है। मुख्यमंत्री भजनलाल शर्मा गोगा नवमी रे मौके जनता ने शुभकामनावां दीनी है।

000

पुलिस अनुसंधान अर विकास ब्यूरो रा स्थापना दिवस रो जळसो काल नई दिल्ली मांय राख्यो जावेला। केन्द्रीय गृहमंत्री अमित शाह जळसा मांय डॉक्टर आनंद स्वरूप गुप्ता स्मारक व्याख्यान देवेला। व्याख्यान रो ई साल रो मुद्दो है – नये आपराधिक कानून-नागरिक केन्द्रित सुधार। जळसा मांय गृहमंत्री नुवा आपराधिक कानूनां रा बारा मांय ब्यूरो री पत्रिका इंडियन पुलिस जरनल रा विशेषांक रो विमोचन ई करेला। ई रे अलावा केन्द्रीय गृह मंत्री साल 2023 अर 2024 मांय बेहतरिन सेवा देवण सारू राष्ट्रपति पदक ऊं नवाजी ज्या अहलकारां रो मान ई करेला।

000

मीलवाड़ा रा सेठ मुरलीधर मानसिंहका राजकीय कन्या महाविद्यालय मांय आज राष्ट्रीय खेल सप्ताह री सरूआत करीजी। आज लंगडी टांग दौड़ अर रूमाल झपट्टा री होड़ां राख्यी ज्यी, ज्यां मांय कॉलेज रा शिक्षक, एनएसएस री सदस्य विद्यार्थी, एनसीसी कैडेट्स अर दूजी छात्रावां उमाव सागे सिरकत कीनी। 31 अगस्त ताई चालण वाळा राष्ट्रीय खेल सप्ताह रा तैत कॉलेज मांय रोजीना खेलां री न्यारी-न्यारी होड़ां राख्यी जावेला। टोंक जिला रा देवली मांय फिट इंडिया मिशन रो शपथ ग्रहण कार्यक्रम राख्यी ज्यो।

00000